

Rapport dalla sessiun dil cussegl da vischnaunca dils 14-03-2016

Tractanda 1

Approbaziun dil protocol dalla sessiun dils 16-11-2015

Il protocol dalla sessiun dils 16-11-2015 vegn approbaus en votaziun unanima cun engraziament.

Tractanda 2

Damonda da credit per la sanaziun dalla via Principala

La via Principala ei gia dapi onns en schliet stan. Oravontut la cuvrida ei fetg donnegiada. Il material da fundaziun corrispunda buca pli allas pretensiuns d'ina via principala cantunala. Consequentamein sto la via vegnir sanada da rudien. Il project sco tal vegn realisau dil cantun sut l'egida digl uffeci da construcziun bassa.

La sanaziun totala cumpeglia l'entira construcziun dalla via sco era dils passapeis. Las adattaziuns vid plazzas privatas succeda tenor basegns. Igl ei indicau d'adattar, remplazzar e cumpletar tut ils conducts che sesanflan el tgierp dalla via. Specialmein eis ei necessari da remplazzar la deflussiun dall'aua dalla via. Quella ei en in miserabel stan. La canalisaziun d'aua tschuffa sco era igl allontanament d'aua da plievgia duein vegnir adattai allas pretensiuns dil plan general pigl allontanament dallas auas. La Corporaziun d'aua Trun cumpletescha ed adattescha el medem mument siu conduct. Era las reits da telecomunicaziun e dil provediment electric vegnan adattadas. Tuts pertuccai separticipeschan commensuradamein als cuosts generals. Cun la sanaziun dalla via vegn gest era la punt Ferrera remplazzada.

Il conduct dall'illuminaziun publica ei defects e caschuna repetidamein disturbis. Las sligiaziuns provisorias ston vegnir adattadas. Perquei ei la sanaziun dall'illuminaziun publica medemamein cumpart dil project.

Sigl intschess dalla Casa Cruna e Casa Vincenz ei la situaziun pils pedunzs buca cuntenteivla e prigulusa. En quei connex preveda il project da sanaziun duas gallarias. El medem mument duei era l'entrada dil vitg avon la Cuort Ligia Grischa vegnir adattada alla nova situaziun.

Ils cuosts totals dil project muntan tenor las calculaziuns da cuosts à frs. 4'940'000.-. La vischnaunca ha da surprender ina cumpart da frs. 1'638'000.- per sanaziun dil passapei existent, per mesiras per pedunzs, per la canalisaziun e per l'illuminaziun publica.

Cun 14 : 0 vuschs conceda il cussegl da vischnaunca il credit da frs. 1'638'000.- per la cumpart dalla vischnaunca vid la sanaziun totala dalla via Principala naven dalla via Staziun entochen la Cuort Ligia Grischa, inclusiv la realisaziun da passapeis e gallarias, sco era dalla illuminaziun publica, sur ils onns 2016 – 2018, cun la resalva dalla votaziun all'urna.

Tractanda 3

Orientaziun davart sal da vias

Il selvicultur Mattias Cadruvi presenta al cussegl da vischnaunca il process naven dalla produenziun dil sal da vias entochen che quel sa vegnir duvraus entras il stradalesser. La vischnaunca da Trun ha in consorzi da sal cun las vischnauncas vischinontas da Breil e Sumvitg. Igl entir consorzi basegna rodund 160 tonnas sal mintga onn.

Tractanda 4

Pusseivladad da tschentar damondas

Dalla pusseivladad da tschentar damondas vegn fatg diever.

Per il cussegl da vischnaunca

Il president
Kurt Wolf

L'actuara
Sandra Gautschi